

ZAKLJUČAK
o odbacivanju Prijave namjere koncentracije privrednog subjekta
Fabrika duhana Sarajevo d.d. Sarajevo

Sarajevo
Novembar 2009. godine

Broj: 01-01-26-032-5-II/09
Sarajevo, 10.11. 2009. godine

Na osnovu člana 42. stav (1) tačka g), a u vezi sa članom 14. stav (1) Zakona o konkurenciji ("Službeni glasnik BiH", br. 48/05, 76/07 i 80/09,) Zakona o konkurenciji, i članom 116. stav (2) Zakona o upravnom postupku ("Službeni glasnik BiH", br. 29/02, 12/04 i 88/07), rješavajući po Prijavi namjere koncentracije podnesenoj, dana 25.09.2009. godine pod brojem: 01-01-26-032-II/09, od strane privrednog subjekta Fabrika duhana Sarajevo d.d. Sarajevo, Pofalićka 5, 71000 Sarajevo, koju zastupa Edin Mulahasanović, direktor društva, Konkurencijsko vijeće, na 97. (devedesetsedmoj) sjednici, održanoj dana 10.11.2009. godine, je donijelo

ZAKLJUČAK

1. Odbacuje se Prijava namjere koncentracije privrednog subjekta Fabrika duhana Sarajevo d.d. Sarajevo, Pofalićka 5, 71000 Sarajevo, radi nepostojanja obaveze prijave namjere koncentracije, u smislu odredbi člana 14. stav (1) Zakona o konkurenciji.
2. Ovaj Zaključak bit će objavljen u "Službenom glasniku BiH", službenim glasilima entiteta i Brčko Distrikta Bosne i Hercegovine.

O b r a z l o ž e n j e

Konkurencijsko vijeće je dana 25.09.2009. godine, pod brojem: 01-01-26-032-II/09, zaprimilo Prijavu namjere koncentracije (u daljem tekstu: Prijava) privrednog subjekta Fabrika duhana Sarajevo d.d. Sarajevo, Pofalićka 5, 71000 Sarajevo, koju zastupa Edin Mulahasanović, direktor društva (u daljem tekstu: FDS ili Podnosilac prijave), kojom FDS namjerava steći kontrolu nad privrednim subjektom Duhan - Zenica d.d. Zenica, Fra Grge Martića 11, 72000 Zenica (u daljem tekstu: Duhan) kupovinom većine dionica provođenjem tender ponude.

Konkurencijsko vijeće uvidom u podnesenu Prijavu je utvrdilo da ista nije potpuna i kompletna, u smislu člana 30. stav (1) Zakona o konkurenciji (u daljem tekstu: Zakon) i čl. 8., 9. i 10. Odluke o načinu podnošenja prijave i kriterija za ocjenu koncentracija privrednih subjekata («Službeni glasnik BiH», broj 95/06), te je, u skladu sa članom 31. Zakona, dana 07.10.2009. godine aktom broj: 01-01-26-032-1-II/09 zatražilo dopunu iste.

Podnosilac prijave u skladu sa zahtjevom Konkurencijskog vijeća je dopunio Prijavu traženom dokumentacijom (podnesak broj: 01-01-26-032-2-II/09 od dana 15.10.2009. godine).

Konkurencijsko vijeće je Podnosiocu prijave izdalo Potvrdu o prijemu kompletne i uredne Prijave, u smislu člana 30. stav (3) Zakona o konkurenciji dana 04. 11. 2009. godine pod brojem: 01-01-26-032-3-II/09.

U postupku ocjene predmetne koncentracije Konkurencijsko vijeće je utvrdilo da je Prijava podnesena u zakonom propisanom roku, u smislu člana 16. stav (1) Zakona.

1. Učesnici predmetne koncentracije

1.1. Privredni subjekt Fabrika duhana Sarajevo d.d. Sarajevo

Privredni subjekt Fabrika duhana Sarajevo d.d. Sarajevo, Pofalička 5, 71000 Sarajevo, je osnovan 1880. godine pod nazivom Fabrika duhana Sarajevo, Sarajevo. Kroz dugogoišnje postojanje društvo je prošlo kroz više organizacionih oblika, da bi u sudski registar Osnovnog suda udruženog rada u Sarajevu bilo upisano rješenjem broj U/1-61188/91 od 23.12.1991. godine kao dioničko društvo u mješovitoj svojini.

Osnovne registrirane djelatnosti privrednog subjekta FDS su proizvodnja cigareta i drugih duhanskih proizvoda.

Povezana društva Podnosioca prijave su sljedeći privredni subjekti:

Tabela 1.

R.b.	Dioničari	Broj dionica (%)
1.	Federalno ministarstvo poljoprivrede, vodoprivrede i šumarstva	39.9058
2.	NLB d.d. Ljubljana	2.8482
3.	Raiffeisen BANK d.d. Bosna i Hercegovina	1.8600
4.	POTEZA BPD, Ljubljana	1.5276
5.	IF "BONUS" d.d. Sarajevo	1.4996
6.	HYPO ALPE-ADRIA-BANK d.d. Mostar	1.3345
7.	IF "PROF-PLUS" d.d. Sarajevo	1.2823
8.	IF CROBIH FOND d.d. Mostar	0.7605
9.	IF "FORTUNA FOND" d.d. Bihać	0.7446
10.	Ostali sitni dioničari (manje od 5% donica)	48,2369
	Ukupno	100,00

Izvor: registar vrijednosnih papira Federacije Bosne i Hercegovine

Privredni subjekt FDS ima vlasničke udjele u sljedećim privrednim subjektima:

Tabela 2.

R.b.	Naziv	Vlasnički udio (%)	Djelatnost
1.	FDS HOTEL BABANOVAC d.d. Vlašić	100,00	Hotel, turistička djelatnost
2.	FDS d.o.o. Beograd, SRBIJA	100,00	Prodaja duhanskih proizvoda
3.	FDS d.o.o. Skopje, MAKEDONIJA	100,00	Prodaja duhanskih proizvoda
4.	UNIVERZALPROMET d.d. Tuzla	88,28	Trgovina na veliko
5.	VAKUFСКА BANKA d.d. Sarajevo	19,72	Banka, finansijska institucija
6.	PRIVREDNA BANKA SARAJEVO d.d.	14,71	Banka, finansijska institucija
7.	REMONTMONTAŽA d.d. Tuzla	13,75	Remont građevinskih objekata
8.	IF BONUS d.d. Sarajevo	12,02	Investicioni fond

Izvor: podaci iz Prijave

1.2. Privredni subjekt Duhan

Privredni subjekt Duhan - Zenica d.d. Zenica, Fra Grge Martića 11, 72000 Zenica, upisan je Rješenjem Višeg suda u Zenici (sada Kantonalnog suda) broj U/I-613/93 od dana 30.09.1993. godine pod brojem: 1-521.

Struktura vlasnika dionica privrednog subjekta Duhan, prije objave tender ponude za preuzimanje privrednog subjekta Duhan, je:

Tabela 3.

R.b.	Dioničari	Broj dionica (%)
1.	FDS d.d. Sarajevo	34,1684
2.	IF MI Group d.d. Sarajevo	16,5929
3.	Čago Bahrudin	5,8307
4.	Sitni dioničari (manje od 5% donica)	43,4080
	Ukupno	100,00

Izvor: podaci iz Prijave na na osnovu podataka Registra vrijednosnih papira u Federaciji Bosne i Hercegovine od dana 18.09.2009. godine

Osnovna registrovana djelatnost privrednog subjekta Duhan je trgovina na malo u nespecijalizovanim prodavnicama.

Privredni subjekt Duhan posjeduje poslovne i prodajne objekte u Zenici, koje daje u zakup drugim privrednim subjektima, što znači da prihode ne ostvaruje od svoje osnovne djelatnosti.

2. Pravni osnov i oblik predmetne koncentracije

Pravni osnov predmetne koncentracije je tender ponuda za preuzimanje privrednog subjekta Duhan, objavljena u dnevnim novinama „Dnevni avaz“ dana 18.09.2009. godine.

U vrijeme raspisivanja tender ponude za preuzimanje privredni subjekt FDS je posjedovao 34,16% dionica sa pravom glasa.

Nakon provedena predmetne transakcije, odnosno tender ponude za preuzimanje privredni subjekt FDS namjerava steći preko 50,0% dionica sa pravom glasa privrednog subjekta Duhan.

Pravni oblik predmetne koncentracije je stjecanje kupovinom većine dionica ili udjela osnovnog kapitala od strane privrednog subjekta FDS u privrednom subjektu Duhan, u smislu člana 12 stav (1) tačka b) pod 1) Zakona.

3. Ocjena prijave namjere koncentracije

Obaveza prijave namjere koncentracije privrednih subjekata postoji ako ukupni prihod svakog od najmanje dva privredna subjekta, u smislu člana 14. stav (1) Zakona, ostvaren prodajom roba i/ili usluga na svjetskom tržištu iznosi 100.000.000,00 KM po završnom računu u godini koja je prethodila koncentraciji, ili ako ukupni godišnji prihod svakog od najmanje dva privredna subjekta učesnika koncentracije ostvaren prodajom roba i/ili usluga na tržištu Bosne i Hercegovine iznosi najmanje

5.000.000,00 KM po završnom računu u godini koja je prethodila koncentraciji, odnosno ako je njihov zajednički udio na relevantnom tržištu veći od 40,0%..

Ukupni godišnji prihodi privrednih subjekata učesnika predmetne koncentracije na nivou Bosne i Hercegovine, na dan 31.12.2008. godine, iznose:

Tabela 4.

Privredni subjekt	Svijet	Bosna i Hercegovina
FDS	(..)** ¹ KM	(..)** KM
Duhan	(..)** KM	(..)** KM

Izvor: podaci iz Prijave

Godišnji prihod učesnika koncentracije predstavlja ukupan prihod (bez poreza na dodanu vrijednost i drugih poreza koji se direktno odnose na učesnike koncentracije na tržištu Bosne i Hercegovine), u smislu člana 8. tačka h) Odluke o načinu podnošenja prijave i kriterija za ocjenu koncentracija privrednih subjekata.

Prema podacima o ukupnom ostvarenom prihodu učesnika predmetne koncentracije (Tabela 4.) i odredbi člana 14. stav (1) Zakona, privredni subjekt FDS nije obavezan prijaviti namjeravanu koncentraciju Konkurencijskom vijeću, jer nisu ispunjeni Zakonom propisani uslovi.

4. Administrativna taksa

Na ovaj Zaključak podnosilac Prijave, u skladu sa članom 2. tarifni broj 108. tačka c) Odluke o visini administrativnih taksi u vezi sa procesnim radnjama pred Konkurencijskim vijećem ("Službeni glasnik BiH", broj 30/06), je obavezan platiti administrativnu taksu u iznosu od 1.000,00 KM u korist Budžeta institucija Bosne i Hercegovine.

5. Pouka o pravnom lijeku

Protiv ovog Zaključka nije dopuštena žalba.

Predsjednik

dr. Stjepo Pranjić

¹ (..)** - Podaci predstavljaju poslovnu tajnu